

四庫全書

子部

欽定四庫全書

少室山房筆叢卷七

明 胡應麟 撰

史書佔畢三

冗篇上

學者多譚五霸而不得其說於桓文之外於是取昆吾  
乎夏取豕韋取大彭乎商以合乎周之齊晉而五之  
自遷史夏商本紀既絕弗載而春秋秦漢雜傳子書

又往往掇拾其一而軼其二是以後世之感滋甚  
蓋余讀汲冢紀年而始得其說焉夫霸之取稱其大  
旨二諸侯而有勞王室錫之茅土俾專征伐而人服  
之若文王之為西伯是其霸霸以功也諸侯而弗共  
王室恃其强大自專征伐而人畏之若共工之霸九  
州是其霸霸以力也自徐偃宋襄攘竊仁義卒以削  
亡為天下笑而戰國之君盛以甲兵土地相凌於是  
乎孟軻氏出大明王道以辟之而霸之云者祇以為

尚力之事概之三代盛時之所謂霸迴不侔矣考竹  
書所紀三事其始之霸也要皆得之於功而其末之  
亡皆失之於力者也夏仲康六年錫昆吾命作霸帝  
芬三十三年封昆吾氏子於有蘇帝癸元年昆吾氏  
出居許帝癸二十八年昆吾氏伐商三十年商師征  
昆吾三十一年商克昆吾此昆吾氏之始末紀於竹  
書者也夏孔甲元年廢豕韋氏使劉累豢龍帝奭元  
年使豕韋氏復國商外壬四年邠人阮人叛河亶甲

元年彭伯克邠五年侏人入於班方彭伯韋伯伐班  
方侏人來賓祖乙元年王即位自相遷於耿命彭伯  
韋伯武丁四十三年王師滅大彭五十年征豕韋克  
之此豕韋氏大彭氏之始末紀於竹書者也合前後  
而較之昆吾也豕韋也大彭也其詳不可得聞其興  
滅之大都槩以具矣夫昆吾氏之霸霸於仲康之代  
而亡於桀豕韋大彭之霸霸於亶甲祖乙之代而亡  
於武丁夫昆吾氏其興弗可考自彭伯韋伯之命於

商而昆吾氏可知也大彭豷韋其滅弗可考自昆吾  
氏之克於商而豷韋大彭可知也然則世之譚五霸  
者以其始之以功霸而合之桓文乎則可以其末之  
以力霸而合之桓文乎則弗可夫桓文固尚力而厥  
功實弗容掩也迹三氏於始則類迹三氏於末弗類  
也是昆吾大彭豷韋桓晉文之說也

春秋戰國之世文士之好奇不已甚哉自古中興之烈  
亡大於夏少康者粵自襁褓之中已蒙大難流離竄

匿四十餘載迄以一成一旅復夏舊物而光大之彼  
其崎嶇有虞仍鬲之間所為布德兆謀蓋將靡所不  
極而史遷本紀盡逸其文後人求之弗得遂舉離騷  
天問荒忽謬悠之說以實之夫夏自太康距於夷羿  
寒浞篡於有窮中間喪亂因仍世已三易而浞與過  
澆狡力相資滅斟弑相跨據都邑視王莽桓玄之禍  
弗啻十倍豈一刺客一虞人之任哉少康履歷僅見  
左氏而首末弗詳惟汲冢紀年差備復夏之事第言

伯靡自鬲帥斟鄩斟灌之師以伐浞世子少康使女  
艾伐過殺澆伯子杼帥師滅戈少康自綸歸於夏邑  
其事雖不可詳考要皆王者正正之師至如離騷所  
謂襲女岐縱田犬則絕不見於簡編也離騷所問蓋  
齊東里社鬼巫墟墓之談屈子放逐無聊感而筆之  
以問後世世儒不能辯斥而好奇如沈約者又引之  
以釋紀年遂使少康靡艾萬古中興之績下全孟嘗  
郭解之儔余不得不辯之



三代而上史書名氏之譌衆矣其最大而可疑可疑而弗可弗辯者亡若伯翳之與伯益自史以伯益佐禹以伯翳先秦司馬貞張守節等並疑其謬而莫能援明證以折衷之故歷世紛紛迄於今伯翳伯益為二也夫使伯翳伯益若共工蒼頡稟陸容成鴻蒙雲將鬻缺之屬荒忽茫昧而不足有亡則可誠禹之佐舜之輔而秦之先則其所係世道何如者而可弗定於一也史遷秦本紀云大業娶女華女華生大費大

費佐禹平水土輔舜馴鳥獸舜妻以姚之玉女是曰  
栢翳為秦之先夫禹作司空天下之大任佐禹濬川  
天下之大功藉令非伯益而別一人則尚書載之當  
參咎繇伍稷契矣今考虞廷臣庶四岳九官十二牧  
輩靡不具載於書而伯翳之文獨不經見以史所稱  
平水土者質之乎書則偕奏鮮食益事也以史所謂  
馴鳥獸者質之乎書則掌火作虞益官也然則尚書  
所云伯益非伯翳而誰耶秦紀所云伯翳非伯益之

誤耶蓋伯與栢其音全

秦本紀作栢

益與翳其聲近故史

記誤以一人析而為二猶幸乎其人雖二而其事則一也然而大費之云又胡以稱也則吾嘗讀汲冢紀年而得之竹書紀啓即位之二年費侯伯益出就國夫史記先稱大費復稱柏翳柏翳為人名則大費為國封矣大費為國名則柏翳為伯益矣即竹書一簡而柏翳伯益大費舉不待辯而明而司馬貞張守節皆置弗道彼索隱者惡在其為索而正義者惡在其

為正也

正義陳紀下亦言二人本一而秦紀陳紀世家並不言按山海經劉歆序先稱伯翳復言

伯益其為一人明甚而太史氏之誤不辯自明矣然正義亦不引

蘇子瞻論周之失計莫甚東遷而以靈王神聖諸侯服  
享為証此但據子朝之書而弗及詳論其世也靈王  
之世孫甯出君而莫能討崔慶弑君而莫能誅陳生  
伯與爭政而莫能斷至假列國大夫以聽訟於王庭  
其紀綱名分幾於蕩無一存矣穀洛之闢王欲壅之  
太子晉之諫可謂切深而王卒弗能用也終其身政

事可見惟聘后致命於齊而已神聖服享果何在哉  
善乎唐李翱之言也神堯以一旅取天下後世不能  
以天下取河北夫唐之弗振豈亦東遷之罪也夫太  
子晉一言晉人遽欲舉侵地而返之俾弗蚤死成宣  
之治可復孰謂東遷計失哉

自文王釋羑里之囚紂錫之弓矢得專征伐世遂以文  
王為西伯至戡黎一事咸曰文王是舉將以震紂而  
萌其悔心也噫文王三分有二以服事殷仲尼至德

之嘆蓋惓惓焉一旦甫釋囚繫而輒有戡黎之舉若  
勾踐以美女秦吳而兵隨其後者孰謂文王之德顧  
為是耶且紂當文王之時三仁未亡天命未絕諸侯  
八百未會而文王遽稱兵以獵其郊視後世亂臣賊  
子舉晉陽以清君側者復奚異哉元儒金吉甫氏獨  
引膠鬲之言直以戡黎繫之於武而文之心始暴白  
於天下萬世然膠鬲之言足以証西伯之為武而不  
足以證戡黎之為武也余考汲冢竹書帝辛四十一

年西伯昌薨四十二年西伯發受丹書於呂尚四十  
四年西伯發伐黎自武王之立以至克殷始終西伯  
之外無別稱焉於是始信戡黎之舉灼然出於武王  
而文之以服事殷沒齒皦無纖芥可以刷百代之疑  
矣金氏前編多引竹書獨茲事關係非眇而紀年所  
載彰明較著特為愉快人心而偶未之引豈考覈有  
所未至耶

甚哉三代而上史氏之說之不足憑也司馬遷列傳七

十而首伯夷而其傳伯夷也始之以逃堯之文卒之以伐紂之諫蓋歷數百千年未有核其實者也夫逃堯之謬有識概能辨之獨伐紂之諫其所關涉甚鉅宜其所紀載特詳乃遷所取證茫茫一烏而世之儒者萬喙一詞即博涉自信如宋羅泌之流亦僅啓其端而其說迄靡竟也夫三代之書遷所取證者六經孔孟之外國語短長莊荀韓呂數子已爾孔子於夷則賢之矣孟子於夷則聖之矣而未嘗概叩馬之事



也孔子於夷稱其餓矣孟子於夷述其清矣而未嘗  
繫叩馬之言也采薇一歌足發明武未盡善而孔則  
刪之食粟之恥有大於不聽惡聲而孟則置之揆之  
事理胡舛謬也先秦之文詳於識文武者宜莫踰左  
氏勇於非湯武者宜莫踰莊周而左國諸書言者弗  
引莊列諸書引而弗言書出於漢之後而足以証周  
之前者汲冢而汲冢諸篇又始終亡一語及也然則  
叩馬之諫太史氏所采據果何書也夫三代之書其

傳於後世常寡而三代之迹其軼於上古常多至聖  
賢大節未有不具載於六經而互見於子史者若之  
何合六經諸子諸史而茫亡一證也故吾斷以為夷  
齊無叩馬之說也然斯語非遷創之蓋戰國遊談之  
口而遷信之太果也夫戰國之談其起於見夷齊之  
遜位而遂疑武王之有爭聞夷齊之居周而遂疑伐  
紂之當阻因委曲傳會而為是與夫叩馬一節在夷  
齊誠優為而君臣父子一言足以樹天地古今之大

戒顧以之垂訓則偉而以之紀實則疎也則君子之讀斯傳者尚亦取其言而姑略其事也哉

仲尼曰伯夷叔齊餓於首陽之下餓之云者蓋以夷齊遜國而貧弗若景公之擅國而富曷嘗謂餓而死也夫孔子餓於陳蔡靈輒餓於翳桑而皆未嘗死胡為乎首陽之下夷齊獨死於餓也食粟采薇其因餓之一言而附會歟夫武王非愎諫者二子之難難遜國弗難叩馬難無怨弗難采薇莊周稱夷齊之咸陽見

武伐殷曰天下亂周德衰不若避之北至於首陽之  
山遂餓而死此太史之說所從出於莊生口也而亦  
可以證其無叩馬之事矣

夫春秋之世之亂也而忍言哉蓋君臣之義絕矣晉欒  
書中行偃執厲公召韓厥厥曰二三子不能事君焉  
用厥也齊崔杼弑莊公人謂晏嬰死乎曰君死社稷  
則死之若為己死非親暱誰敢任之韓厥晏嬰夫非  
春秋所謂賢者哉君父之仇義不共天臣弑君子弑

父殺無赦亡論其職大小也二子身為大夫驟聞君父之難當率先有衆奉大義而討之誅元惡以靖國家上也苟不能則死之又不能則去之舍是無可言者方厲公之執而書偃之名也厥挺然力爭尚庶幾萬一挽回必不得已猶當致命畢力於嗣主之世而始焉則為克之中立以觀其變繼焉則為盾之同黨以遂其奸晉尚為有人乎蓋厥也弗臣而悼也弗子矣夫人臣之義食焉弗避其難嬰之食誰之食也莊

弑而弗從猶之可也方莊之未弑弗當諫與迨莊之  
既弑弗當討與諫而弗行與討而弗遂弗俱當去與  
四者之義嬰亡一焉生食其祿死而置之臣焉用哉  
夫春秋之世君臣道絕矣以二子之事如彼而世以  
為賢後世亦卒無有非之者甚矣大義之難明也

豫讓漆身吞炭以愧人臣之懷二心者讓蓋以義士自  
許也當時凜然義之後世亦翕然義之至蘇氏胡氏  
直以為聖賢大學之道甚矣宋人之陋也余以為讓

特刺客之好名者非惟弗知義殆近於弗知恥其所  
言正以教人臣之懷二心而胡以愧也夫君臣父子  
一也父有弗子子無弗父君有弗臣臣無弗君孟軻  
氏論手足腹心報施之道至矣而其言可以訓天下  
之為君不可以訓天下之為臣可以陳於唐虞桀紂  
之前不可以譚於春秋戰國之世以故言出於孟氏  
而豪傑猶或非之然而曰犬馬曰土芥曰國人曰寇  
讐其輕重之等較若也夫范氏荀氏滅於知氏知氏

滅於趙氏則知氏於范氏荀氏正趙氏之於知氏也  
讓以衆人報范氏荀氏則二氏之亡仕他姓可矣曷  
在乎仕其故主之仇之後而且為之盡力也不幾於  
寇讎之報報犬馬之視乎夫瑤之未敗果知之讓擇  
而事之惡取其知瑤之將敗締爭之讓默而成之惡  
取其賢瑤亡也可以死矣弗死襄執也可以死矣弗  
死至再刺而再執也猶弗死惡取其勇俾襄子而再  
釋焉將以刺終乎將以弗刺終乎刺而中胡以見襄



子於身後刺而弗中胡以見襄子於生前終止而弗  
刺胡以自立於天下萬世故吾直以讓非惟弗知義  
而近於弗知恥也其屢屢焉惜其一死務以成其一  
刺之名而已於人臣無二心奚有也即人臣二心將  
以讓藉口而又奚愧也夫為讓計宜何如曰死范氏  
荀氏上也死知伯之亡其次也死襄子之執又次也  
以刺而報其主則已卑卑再刺而再弗行而卒弗死  
而欲以漆身吞炭愧人臣之懷二心者難矣哉

以知  
氏無

人而讓無為而為者尤謬夫鼎政尚不欲顯其名而要離致戮妻子奚為也

自山東遭秦禍諸侯之得志者三而蘇氏之合從弗與焉孟嘗之臨函谷也信陵之存大梁也趙奢之救闕與也孟嘗信陵俱貴公子率列國以攻秦獨奢起小吏提孤軍大破秦師其事甚偉功甚奇乃讀史者忽焉第知奢之勝而已而所以勝弗知也當秦之圍闕與也惠文以問廉頗頗以為難救何哉闕與之地秦韓趙三國之交秦攻韓而移兵闕與蓋出趙之不意

也而趙始發兵救之令秦也據險以拒趙若魏太祖之屯柴壁則趙師阻令秦也扼險以要趙若唐太宗之襲美良則趙師殲二者皆曉兵所忌而頗位趙上將聲聞諸侯固不肯輕用其名闔成敗於鼠穴也奢則未嘗有戰伐之勲一旦欲翹然自樹勢不容不出死力以見其奇而奢方拔自細微又易以愚秦耳目於是頓兵邯鄲增壘以示吾弱而弛敵之防堅壁以蓄吾威而俟敵之間至於二十八日之久彼師已老

而我師方壯然後乘秦謀之往而卷甲以趨之秦欲  
拒吾於險之外而吾已入欲邀吾於險之內而吾已  
出比秦人悉甲來攻而吾壁壘已成士有必死之志  
以久蓄之鋒乘初至之銳勵必死之勇以馳乎疲勞  
暴露之師此其廟勝之勢在趙在秦不待智者而決  
矣或曰奢之勝歷之謀也歷所謂厚集其陣先據北  
山皆兵家之常偶合於奢而奢用之蓋奢之勝而非  
所以勝也奢受命出師勝秦固燭鑑焉而待歷乎哉

然則廉頗之議失與頗秦所忌奢秦所易也奢將則敵信而弗疑頗將則敵疑而弗信故奢之事頗雖勇有弗能行頗之言奢雖勝有弗能奪也夫道遠險狹頗之言誠未為失而長平之役亦奢也有以徇之悲夫

樂毅不拔二城夏侯玄以為庶幾湯武何其陋哉河汾氏從而諛之眉山氏又從而駁之是皆有疑於毅之不取而未嘗熟察古今攻守之大勢也以吾論之即

墨之守不必智如田單而後全而二城之拔非特毅  
有所不能即力與材倍蓰於毅者未可必也胡不以  
戰國推之燕視秦鬪士孰銳毅視武安君起將略孰  
優下齊七十餘城坑趙四十餘萬震壘孰甚燕之圖  
即墨視秦之圖邯鄲孰急平原安平之應變孰短孰  
長智者所了也然起以百戰之威挾秦國之衆乘長  
平之勢蹙垂亡之趙一圍而不能舉再命而不肯行  
三迫而甘伏杜郵之劍觀其力拒應侯之請即未必

盡然而邯鄲之不易克固昭昭矣獨於毅焉疑之可  
乎夫齊之與燕勢相軋也單之與毅略相等也然而  
主客異勢怠奮異心重以嗣主狐疑鄰國反間亡臣  
合力戰士思歸騎劫之代蓋毅有天幸焉不然其能  
成師返哉故吾謂即墨之守非單亦全二城之拔非  
毅所及而論事者必灼見古今攻守之大勢而後可  
也

甚矣攻守之勢之相懸絕也故守者將有不必才兵有

不必衆而攻者將之才有無所用而兵之衆有無所  
施夫王莽以百萬圍昆陽也而殲隋煬以百十三萬  
圍平壤也而潰此其兵莫衆矣則曰將非才也孔明  
以十萬圍陳倉而不拔孫權以十萬圍合肥而幾擒  
此其將莫才矣則曰兵非衆也光武悉漢將之良以  
圖天水而折北神武悉齊兵之銳以圍金墉而殞身  
此將非弗才兵非弗衆矣則猶曰敵堅也拓跋英楊  
大眼以四十萬圍鍾離而隻輪不返郭子儀李光弼



以六十萬圍相州而九師盡奔此將非不才兵非不  
衆敵非不脫矣則猶曰救至也至魏太武屯百萬於  
宋唐太宗聚天下於遼則不惟將之才絕古今而且  
帝矣不惟兵之衆極海宇而且精矣王莽隋煬  
兵未必精加以  
盱眙小城安市夷帥敵非勍也義隆破膽延壽望風  
救已絕也然而卒自解者何以故也故曰攻守之勢  
懸絕甚也有善守則無善攻也而況乎樂毅之將燕  
昭之兵而攻乎田單之守若之何二城之可拔也而

夏侯氏以庶幾湯武然乎否哉

白起坑長平四十萬古今以罪趙括括輕躁寡謀可罪也而長平之事則大有難言者世襲故常類以括為妄庸豎子則弗考之甚也何者四十餘萬之衆匪易御之師也四十餘日之圍匪易支之困也使括也而果妄庸豎子若宋義劉秩李元平輩將鋒交即潰曷能以其衆戰耶將伏發即殲曷能以其衆守耶以四十萬之兵陷必死之地壁四十餘日之久而亡一叛

者至括死而後降則括之為括可知也括當時所與  
援桴對壘何人哉秦兵之彊天下靡敵焉白起所擊  
天下靡堅焉彼且因失地之忿勵用壯之師非閼與  
之戰兵亡名將亡勇者比也當起未將而頗之禦統  
已惴惴矣洎乎武安既出秦掃境以潛屬之而其王  
又親至河內發穉弱以趣之蓋不啻宋人所謂空國  
而戰者噫嘻當其時事勢之亟何如也吾以即信平  
弗代而馬服復生未易云也夫括也果若李元平輩

則一王統舉之矣而胡以必起以寡擊之以正擊之  
止不可者而胡以用衆而胡以用奇且一朝食滅之  
矣而胡以若是久也惟將而必起而必用衆而必用  
奇而括之不得為妄庸豎子也審矣

秦之縱反間也第欲將括趙卒將之而括卒覆其軍胡  
秦之巧趙之拙而括之愚也當孝成之受上黨也議  
之平原平原以廉頗當起其策之亦審矣及頗失亡  
堅壁孝成讓之而秦間之入直以頗為易與且降頗

也將四十萬之衆外創於敵而內迫於君是章邯鉅鹿之勢也縱頗之才足以堅守趙之君臣而聞斯語其能無矍然動哉而當其時孰可以代頗者馬服王安平亡李牧方保塞未知名蓋六國之將舉亡任此不特趙也獨括素喜兵時亦以能將歸之而先是父奢又嘗代頗却秦故孝成平原驟舉之而不惑也夫秦之利在去頗不在任括趙之失不在任括在廢頗頗代而四十餘萬之命已懸於白起之手矣方是時

趙之風將頗外樂乘龐煖二子而已趙不將括而將  
二子未必不為芒卯扈輒之續而其敗或速於括未  
可知也括堅守四旬而救弗至而卒以身死敵雖不  
足以贖其債軍之罪較之誤國而降者猶有間也而  
世之罪括甚於趙葱騎劫而孝成平原夷於王遷郭  
開余是以悲之

謂長卿封禪貢諛信乎弗貢於生前而貢於死日彼欲  
以奚冀焉謂子雲美新漁進信乎弗漁於少日而漁

於暮途彼欲以奚為焉夫封禪見謂名高而弗知聖  
王弗繇也夫美新見謂明哲而弗知節士弗意也是  
二子之所蔽也夫漢俗急功利躁而獲者夥矣獨二  
子恬然而宋人以文士故加惡聲而弗原其衷論其  
世悲夫

侯考

少室山房筆叢卷七

欽定四庫全書

少室山房筆叢卷八

明 胡應麟 撰

史書佔畢四

冗篇下

陸終氏娶鬼方之女孕而不育十一年開其左脇而出  
三人焉又開其右脇而出三人焉長曰昆吾名樊已  
姓封於衛次曰參胡董姓封於韓周時為吳國楚滅



之三曰彭祖名翦彭姓封於韓大彭之墟卽彭城也  
四曰會人姁姓封於鄭五曰安曹姓封於邾六曰季  
連芊姓其後為楚昆吾氏為夏伯湯伐桀滅之彭祖  
氏為商伯商之末世始亡于寶曰先儒多疑此事譙  
周作古史考以為妄記廢而不論然六子之世子孫  
有國數千年間迭為霸王天將興之必有尤物若夫  
前志所傳修己背坼而生禹簡狄胸坼而生契歷代  
久遠莫足相證近汝南屈雍妻王氏男從右脇下水

腹生而和平自若足相證明按剗胸裂背古有斯文  
品體駢胎近所恒覩然未有二脇並開六子具顯者  
古今迂怪之文止甚於此譙周所駁允矣干氏舉一  
端以蔽之是欲以毫末槩丘山也謬哉

劉知幾史通云汲冢瑣語稱舜放堯於平陽而書云其  
地有城以囚堯為號識者憑斯異說頗以禪受為疑  
又云汲冢書稱舜放堯於平陽益為啓所誅又太甲  
殺伊尹文王殺李歷凡此數事語異正經其書近出

世人多不信也按舜之放堯文之殺季無事別說足驗其情已於此篇前後言之詳矣夫惟益與伊尹受戮並於正書猶無其證推而論之如啓之誅益仍可數也右俱劉語按汲冢書目云瑣語十一篇諸國夢卜妖怪相書也則瑣語之書大抵如後世夷堅齊諧之類非雜記商周逸事者也其書自隋唐志外諸家書目咸所不載蓋自汲冢既出之後旋就湮沒可知惟紀年載太甲殺伊尹沈約固疑為後人所增至王

殺季歷乃商君文丁非文王也考劉史通前後議論  
務以春秋亂臣賊子臆度前聖故妄意文王得位亦  
如商臣許止之為而不詳考本書恣其臆喙真所謂  
言奸而辯記醜而博者其能免仲尼之誅乎夫即劉  
引紀年鹵莽不稽若此則所謂璣語云云者其足信  
哉

唐柳璩有史通析微十卷專辯前十數事通考有此目惜今未見果爾未可謂秦無人也

武侯自擬管樂管九合一匡才誠不世而所輔桓公所  
用齊國挾天子令諸侯其勢易舉績用易成武侯扶

弱主藉偏邦人心去漢迴不侔也至規模局量則檻車三顧寵辱異觀五畝三歸宏隘殊域不待言矣樂策士之雄耳內襲燕昭之銳外因齊湣之湛中入蘇代之間即他帥行師臨淄反掌何難於毅而武侯匹哉大抵孔明為當時言不容大盡否則陳壽之詞與將略非長同一誣謬非事實也

萃楚躬耕南陽抱膝處全也成湯三聘豫州三顧出全也伐桀弔民出師復漢心全也德感嗣王誠格庸主

道全也尹奮乎百世之上故人亡異詞亮崛起三代  
之後故家肆臆喙杜工部云伯仲之間見伊呂蓋千  
載論孔明者至是始定孰謂文人筆端迂遠情事亡  
足重輕哉

抱朴子逸民篇云魏武帝刑法嚴峻果於殺戮乃心欲  
用乎孔明孔明自陳不樂出仕武帝謝遣之曰義不  
使高世之士辱於汙君之朝也其鞭撻九有草創皇  
基宜矣稚川去魏未遙孔明傳註俱不載姑記此

漢末諸葛氏分處三國並著忠誠以為蜀得其龍吳得其虎並自篤論至魏廼曲為訾詆此晉人諛上之詞耳瑾子恪孫竦亮子瞻孫尚誕子覲孫恢奕葉知名諸葛之才一何盛也恪以材誕以節俱覆宗族禍害略全瑾以喬延息於蜀誕以覲續嗣於吳天之不絕賢者又何其巧相似也瞻則死君尚則死父懿哉武鄉其有後矣恪材辯英英照耀一世伐魏之舉乘其釁隙豈曰佳兵觀其論衆之書胡異厥叔世率以成

敗論惜哉

按史誕與瑾亮雖並稱豐后而不言行輩恪嘗與誕相拒東闕似非近族然恪死後臨淮臧均表乞收葬略云故太傅恪得承祖考風流伯叔諸父遭漢祚盡九州鼎立分托三方並著忠誠熙隆世業考魏公休以前未有顯者所云忠勤世業舍誕而誰則於恪為諸父正子瑜兄弟行耳

史以誕欲保有淮南晉人筆耳鍾會稱姜維云伯約名



士公休太初不足多也鍾高視一世而居誕二子間其人可想壽春之破致死者數百人詎不偉哉

三國時人才盡入曹氏彀中吳蜀智計之士往往不乏而文學何寥寥也禰正平自文舉德祖外略不挂齒乃頗及張子布意昭於文學必有可觀惜世遂不傳虞翻陸續顧邵父子間標令譽至於風雅並似不嫻韋曜薛瑩一二染指無復五言蜀許靖秦宓譙周郤正輩率文士也詩遂絕響矣

韋曜傳注本名昭史臣避晉諱易之此不然張

昭何以不易蓋  
曜所自改也

魯肅居軍旅間手不釋卷談論文辭思度悠遠三國將  
帥有儒者風諸葛外一人而已而世罕知之肅不死  
關不亡乘襄樊之銳與蜀併功中原復矣肅死蒙代  
與權遜定計襲關蜀失荆大事遂去炎燼以灰蒙者  
千古亡漢之賊也不足與張承業為奴

肅深不欲取  
關公詳本傳

中

當塗為魏典午為晉世率知之而意義出處或未明了

按代漢者當塗高春秋識也自西京末茲語盛傳光武與公孫述書嘗稱及而竟無驗及曹氏僭號譙周以問杜瓊瓊曰魏闕名也當塗而高識驗矣然安知非老瞞擅國之日故封魏以應謠言耶識不足信此蓋可見典司也午馬也見周所為識文後果驗史謂周有他數術假識為言耳

世傳天策府十八學士以唐一代人才盡此然當時隱太子及齊王元吉各延攬相傾秦邸不能兼得也按

史武德初太子建成與秦齊二主勢位相軋爭致名  
流以自助太子則詹事李綱竇軌庶子裴矩鄭善果  
友賀德仁洗馬魏徵中舍人王珪舍人徐師謨率更  
令歐陽詢典膳監任瓌直典書坊唐臨隴西公府祭  
酒韋挺記室參軍事庾抱左領大都督府長史唐憲  
秦王有友于志寧記室參軍事房玄齡虞世南顏思  
魯諮議參軍事實綸蕭景京兵曹杜如晦鎰曹褚遂良  
士曹戴胄閻立德參軍事薛元敬蔡允恭主簿薛收

李道玄典籤蘇幹文學姚思廉褚亮燉煌公府文學  
顏師古右元帥府司馬蕭瑀行軍元帥府長史屈突  
通司馬竇誕天策府長史唐儉司馬封倫軍諮祭酒  
蘇世長兵曹參軍事杜淹倉曹李守素參軍事顏相  
時齊王有記室參軍事榮九思戶曹武士逸典籤裴  
宣儼文學袁朗及從弟承序然則秦邸幾有雲臺之  
數亦不止十八也內顏思魯師古相時父子兄弟褚  
亮遂良父子薛收元敬淹如晦叔姪一時同與盛矣

天策十八學士像間立本寫今藏兵科中原在大內相  
傳永樂中收付兵科每詹翰諸臣供事廷試者必留  
飲科中索一玩以為故事萬歷初周公瑕遊燕中得  
摹本知卷為沈存中家物而跋尾書迹不逮因為補  
錄之瑯琊兩王公俱有跋大學士淮南李公介弟子  
繁刻之石嘗以一本遺家君余及見之存中跋謂圖  
中名字官秩與史多不合如姚東字思廉史作姚思  
廉東之蘇壹陸元朗薛莊史皆以字為名李玄道蓋

文達于志寧許敬宗蔡允恭史皆不字房玄齡字喬  
年史以房喬字玄齡孔穎達字仲達史以為字穎達  
蓋唐書成於後人之手此皆當時紀實者也右皆存  
中跋語然以余所見圖中最可疑者莫如顏相時圖  
載相時字師古按史師古相時兄弟也師古字籀相  
時字睿師古亦為秦王府文學聲實出相時上而天  
策之選不與相時傳新舊唐書皆云武德中與玄齡  
等為秦府學士舊唐書瀛洲事未復言相時有兄師

古紀載甚明當時在選決相時無疑而以師古為字  
存中博極羣書諸學士官名全異悉考列跋中此其  
大矛盾者胡絕口不及嘗意摹本非存中之舊後人  
因筆談所載按其名字與史異者贗作斯圖而不知  
相時何人以為即師古也第存中所考史傳亦自多  
互異唐書薛收傳以為圖像而思收存中以為思收  
而圖像按收四年入館至七年卒以劉孝孫補之未  
圖像之先孝孫已召入為學士不因思收始以孝孫



補也新舊唐書褚亮傳俱以贊亮作杜如晦傳亦云而存中以為于志寧考志寧傳不言此然亮及志寧各有贊其語殊不類自為藉如傳及存中言則二人必居其一並可疑也存中引蘇世長名對玄武門上譏其名長意短以蘇為學士日改名按史世長入唐高祖責為屯監尋引見玄武門與語平生因調之曰何名之長而意之短此時世長未嘗入秦邸存中蓋誤以高祖為太宗唐書孔穎達元字仲達不云字穎

達也存中素名不妄而所取證咸牴牾若是蓋全憑  
記憶不檢冊書考之前輩往往有此病也惟諸人史  
不載字者王太常謂可補當時之闕誠然第以相時  
律之政恐不皆實紀耳

于志寧字仲謚李元道字元陽蔡允恭字克讓許敬宗字

延族劉孝孫字德祖蓋文達字文達

武曌以淫北穢亂唐室實曠劫所無之變而一代英才  
傑士俯首臣伏無敢聲其罪者獨駱賓王廣陵一檄  
詞嚴義正足寒猾賊之膽蓋唐初第一流人物也而

生蒙淺躁之譏死惟怨望之訕史氏因循置於文苑  
并其字失之遂令邑中祀典千載寥寥往余籍弟子  
員日嘗以白督學建安滕公滕公急材甚業舉行會  
擢任去不果蘇觀察君禹繼至雅是余論即移文祀  
駱於鄉此舉不特為當時節士伸冤亦為萬古詞場  
吐氣也

唐郝雲卿云賓王仕高宗至侍御史天后臨朝數上書  
諷諫得罪貶臨海丞遂與李敬業起義廣陵然則賓

王勁氣直節始終無毫髮可議自裴行儉惑衆於先  
魏元忠助桀於後致忠義之操久湮不白自是人間  
世一大缺陷余不得明目張膽言之匪以同里故  
也

唐人稱賓王上書諷諫武氏得罪必責其復辟廬陵之  
故不然何以稱諷諫何以致得罪而賓王又何以遂  
與敬業起兵也

用修云孔北海大志直節而與建安七子並稱駱賓王

勁辭義舉而與垂拱四傑為列以文章之末技掩其  
立身之大閑可慨也君子當表而出之楊氏此論甚  
公然謂大閑掩於末技恐不應爾妖牝竊唐舉唐臣  
子頌德恐後自賓王一檄痛責其姦大聲其惡學雖  
漏網千載下罪孽歷歷即輶轢都市不過何云末技  
且當時從敬業起事詎止賓王一人今皆湮沒無聞  
而賓王以一檄故名流天壤謂文章傳氣節乎氣節  
重文章乎

賓王起義人所共知而不知其奉母至孝集中三與上官啓皆以捧檄負米為言至裴行儉辟為記室則辭以母老不堪遠行情致酸楚詞旨真篤字字滴淚即李令伯表不過也道王命以自陳則抗言不答半千諭以干進則守道不迴凡賓王操履類出唐文士上遺集班班學者徒泥裴語何哉

駱答裴書云義士期於壯夫忠臣出於孝子既不能推心奉母亦焉能死節事人駱之器識如此而裴以為

浮躁淺露彼方陳力牝朝詎相入哉

裴雖死高宗末  
實武后用事世

凡稱知人者知其人臧否邪正耳窮達修短則姑布子  
平小術君子不道也裴行儉以器識短王楊四子幸  
而偶中至今儒者樂道之卮言云裴所稱王勳王勔  
蘇味道皆覆身竄籍何以優劣四子余謂此不必辯  
使勳勔果有奇節卓行即裴言不中吾猶以為確論  
今徒以位遇通塞為驗則裴所見真姑布子平之術  
耳況勳等即如裴論不過浮淺小節而味道輩摸稜

邪諂榮寵北朝器識何在裴之取捨如此其足以溷  
詞場欺達者哉

方萬里云裴儉以富貴骨相取人而文以器識之說吾  
未見其能合於四子也賓王一檄氣蓋萬古雖敗何  
傷杜爾曹身與名俱滅不廢江河萬里流旨哉

史稱駱賓王失職鞅鞅遂與徐敬業起兵夫孽后臨朝  
羅織萬態即狄仁傑輩尚誣以反況賓王倡義殺身  
欲加以罪寧足據乎且文人失意憤悱其常屈平懷



沙賈生夭折後世咸悼其忠賓王首倡大義庸可以  
此譬之駱集十卷今存自疇昔書憤二章外無一鞅  
鞅語至忠孝氣誼淳鬱諸製作間有足異者詳見別  
條

萬厯戊子秋蘇君禹行部婺中余特為賓王上事云竊  
見故唐臨海縣丞義烏駱賓王勁氣高風瑰材絕行  
文詞冠代志業超羣挺生景龍垂拱之辰驟揭天寶  
開元之軌雕章繪句則霧卷霞舒授簡揮毫則星流

電掃楊盧遜其渾博沈宋範以馳驅逃榮上裴行儉  
之書陸沈靡悔潔已拒員半千之請壁立難攀至孝  
篤於平生孤忠竭於始仕微官奉母任武功簿而不  
辭直道事人謫臨海丞而愈奮值北晨之司國三綱  
斃而九法淪偕勲胄以勤王片檄呼而大衆集慨一  
抔之黃壤問六尺之遺孤歷數屠兄殺子之姦元兇  
褫鬼巫發醢母弑君之惡巨猾寒心旣已首建義旗  
將裂渠魁於七廟不幸身膏逆刃尚飛靈爽於千秋

偉哉國士無雙詎謂文人寡行痛史氏因循弗蒐羅  
於誼烈迺邦人寡陋迄罷享於烝嘗誠萬古不白之  
沈寃實一代當興之鉅典伏惟褒錄遺忠闡揚大節  
修廢隆廣勵風猷俾乾坤壯氣昌明於崇正之朝  
海甸英魂振勵於右文之日云云以論賓王事附載  
此今補注已祀郡城余嘗集駱詩文闕涉者  
并昔人遺論為駱侍御忠孝辯有他刻

少室山房筆叢卷八

欽定四庫全書

子部

少室山房筆叢卷九

十九

詳校官中書臣吳璲

員外郎臣牛稔文覆勘

總校官知縣臣繆琪

校對官中書臣李斯咏

謄錄監生臣朱坦

欽定四庫全書

少室山房筆叢卷九

明 胡應麟 撰

史書佔畢五

雜篇上

玄黃之間事變昭合者古今實繁迺前人之採述一何寡也自明諸薦紳先生博雅君子稍稍留意若餘冬序錄藝苑卮言詳矣然率異代也余偶讀六朝諸史

得事之符節者若干條漫錄於左以資談噓其已見  
二書及世說語林一門並載者與夫事全代異者咸  
置弗收至於諸代當以次漸及焉

小說家全  
者并附

齊武帝子巴東王子響要直閣將軍董蠻同行帝為易  
名仲舒因戲曰今仲舒何如昔仲舒對曰昔日仲舒  
出自私庭今日仲舒降自天帝以此言之勝昔遠矣  
梁武帝子西昌侯藻遣蜀人李膺奉使入都帝戲謂  
曰今李膺何如昔李膺曰今勝問之曰昔事桓靈之

主今逢堯舜之君大為擊節

晉桓溫有大志不時就嘆曰為爾寂寂為文景所笑王融年三十急欲為公輔嘗嘆曰為爾寂寂鄧禹笑人溫尋卒融亦被收

宋顏師伯與孝武搏菹孝武擲得雉謂必勝師伯次得盧亟取子斂之曰幾作盧遂輸直百萬梁韋叡與曹景宗搏菹景宗擲得雉叡次得盧遂取子反之曰異

事遂作塞亦輸直百萬

叡錢出昌義之稍異

晉王弼數侮鄭康成忽夜聞履聲見一人入閣中自稱  
鄭玄數弼曰君年少何以穿鑿文句而妄譏老子也  
弼惡之俄病卒魏劉蘭排毀董仲舒忽有人葛巾野  
服直入蘭讀書處謂曰君自是學士何為苦相排毀  
義理短長竟誰在而無禮見凌也今召卿往蘭尋卒  
晉謝據好上屋熏鼠男胡兒都不知聞人道作此者輒  
戲笑之前後不一謝公因語次謂曰世人以謗中即  
言我亦共為爾胡兒大悔失言謝康樂父不慧而靈



運好臧否人一日同宣遠登車盛欲揚推宣遠潜然  
曰秘書蚤世外議亦互有異全靈運論遂衰止

齊劉祥遇褚淵入朝以腰扇障面祥曰作如此舉止羞  
面見人扇障何益淵怒曰寒士不遜祥曰不能殺袁  
劉焉免寒士謝超宗遇褚淵送客墮水超宗大笑曰  
投畀河伯河伯不受淵嗔曰寒士不遜超宗曰不能  
賣袁劉焉免寒士

晉王敬倫風姿似父作侍中公服從大門入桓公望之

曰大奴固自有鳳毛宋謝鳳子超宗嘗作殷淑儀誄  
帝大嗟賞謂謝莊曰超宗殊有鳳毛按謝事在王氏  
後今世率稱謝而不及王余意鳳毛謂靈運耳南史  
靈運子鳳蚤卒不言能文章以劉道隆犯諱故此語  
獨傳如敬倫父豈亦名鳳耶

宋沈慶之不肯北伐文帝強之慶之曰耕當問奴織當  
問婢陛下謀白面書生事何由濟師竟無功魏邢巒  
不欲圍鍾離魏主詰之巒對曰耕則問田奴絹則問

織婢臣既謂難必無克理城果不拔

吳孫皓勸晉武帝酒曰昔與汝為鄰今與汝為臣上汝一盃酒願汝壽萬春宋王歆之贈劉邕歌曰昔與汝為臣今與汝比肩既不願汝酒亦不願汝年

宋中書舍人狄當周赴詣張敷先旁設二牀去壁三四尺二客就席數呼左右曰移我牀遠客赴等失色而去齊中書舍人紀僧真以武帝命詣江數登榻坐定數便命左右曰移吾牀讓客僧真喪氣而退又王僧

達焚路太后弟所坐牀亦類

齊侯景出鎮河南謂神武曰今握兵在遠人易為詐所  
賜書背乞加微點神武卒世子澄以書徵之書背無  
點遂不至發兵反隋高祖與漢王諒約凡璽書徵召  
敕字傍別加一點高祖崩太子廣以書徵之以敕字  
無點遂不至發兵反

宋檀道濟伐魏叔孫建以輕騎邀其運道道濟夜聚沙  
覆之米唱籌量之魏謀以為糧也因殺告者道濟全

軍而返周賀若敦伐陳侯瑱以舟師斷其糧援敦聚  
土營內以米覆之集諸營軍士各持囊詣官司若請  
給者陳人信之全軍而返

宋陸修靜以白羽扇遺張融曰此旣異物以奉異人齊  
高帝以白羽扇遺孔靈產曰君有古人之風故贈君  
古人之服

齊明帝以漆燭盤賜傅昭曰君有古人之風賜君古人  
之物梁昭明以瓠食器賜劉杳曰卿有古人之風故

賜卿古人之器

四事大同蓋六朝口語類  
爾前以羽扇事全故各類

晉向秀注莊子妙析奇致大暢玄風唯秋水至樂二篇  
未竟而秀卒秀子幼義遂零落然猶有別本郭象見  
秀義不傳於世遂竊以為已注乃自注秋水至樂二  
篇又易馬蹄一篇其餘衆篇或定點文句而已又高  
平郁紹作晉中興書數以示何法盛法盛有意圖之  
謂紹曰卿名位達不復俟此延譽我寒士無聞於時  
如袁宏干寶賴有著述流聲宜以為惠紹曰一生苦

心具在於此非吾子之所能奪也遂勿與法盛銜  
之紹書成藏於齋內厨中法盛詣紹會紹不在直  
入竊書紹無兼本遂行何書

何事別無考或未必盡然第向以別本而

存紹無兼本而沒此當知也

梁賊宋子仙破會稽得庾肩吾欲殺之先謂曰吾聞汝  
能作詩今可即作若能將貸汝命肩吾操筆便成辭  
采甚美賊釋之齊獠賊執張融將殺之融神色不動  
方作洛生詠賊異之而不害

世譏賦詩退虜余嘗集此例十數為吾黨解嘲

齊何恢有妓張耀華美而有寵阮佃夫求之恢曰恢可  
得此人不可得也阮遂諷有司以公事彈恢罷之晉  
石崇妾綠珠美孫秀命使求之崇悉出諸妾數十使  
者曰奉命求綠珠他非所欲崇勃然曰此人不可得  
也秀遂以事害崇

宋范曄作和香方序曰麝本多忌過分必害沈實易和  
盈斤無傷零藿虛燥詹唐黏濕甘松蘇合安息鬱金  
之屬並被珍於外國無取於中土又棗膏昏鈍甲煎



淺俗非唯無助於馨烈乃當彌增於尤疾也所言悉  
以比類朝士麝本多忌比庾仲文零藿虛燥比何尚  
之詹唐黏濕比沈演之棗膏昏鈍比羊玄保甲煎淺  
俗比徐湛之甘松蘇合比慧琳道人沈實易和自况  
又卞彬為禽獸決錄目禽獸云羊性淫而狼猪性卑  
而率鷲性頑而傲狗性險而出皆指斥貴勢其羊淫  
狼謂呂文顯猪卑率謂朱隆之鷲頑傲謂潘敞狗險  
出謂呂文度其險詖如此又蝦蟇賦云紆青拖紫名

為蛤魚比令僕也又云蝌斗唯唯羣浮閭水為令史也

湘東王徐妃以王眇一目常作半面粧其臣暨季江語人云蕭溧陽馬雖老猶駿可騎徐娘雖老猶尚多情齊祖珽乘老馬常自號騮駒又與寡婦某通常令左右呼娘子其友人謂之曰老馬十歲尚號騮駒一妻耳順強呼娘子

李獻吉徐娘老去風情在用此事見梁元徐妃傳

齊范元琰以園蔬為業嘗出行見人盜其菰元琰遽退

走母問其故具以實答母問盜者為誰答曰向所以  
退畏其愧恥今啓其名願不泄也於是母子秘之或  
有涉溝盜其筍者元琰因伐木為橋以度之自是盜  
者大慙一鄉無復草竊又郭原平宅上種竹夜有盜  
其筍者原平遇見之盜者奔走墜溝原平乃於所植  
竹處溝上立小橋令通又採筍置籬外鄰里慙愧無  
復取者

又沈道處遇人盜菜并筍事絕  
類但沈則市筍遺盜故附此

齊解叔謙母有疾夜於庭中稽顙祈福聞空中語云得

丁公滕為酒便差即求訪至宜都見山中一老公伐木問之答曰丁公滕也叔謙便拜伏流涕此公愴然授以四段叔謙受之顧視此人不復知處又滕曇恭年五歲母楊氏患熱思食寒瓜土俗所不產曇恭悲哀切俄過一桑門問其故曇恭具告桑門曰我有兩瓜分一相遺還以與母舉室驚異尋訪桑門莫知所在王儉時隨僧虔在郡號為滕曾子又同時宗元卿有至行鄉里宗事號宗曾子又蔡曇智鄉里號為

蔡曾子皆齊人也

宋張暢常念持觀音南譙之構逆也暢不從王欲害之  
夜夢觀世音曰汝不可殺暢遂不敢害及王敗暢繫  
獄誦觀世音經千遍鎖寸寸斷獄司易之復斷吏因  
釋之又太原王玄謨北征失律軍法當死夢人謂之  
曰汝誦觀世音千遍可得免禍誦滿千遍將就戮將  
軍沈慶之諫遂免

并後俱出太平廣記相類頗衆  
以方外恐不皆實略舉二條

吳人陸暉繫獄分死乃令家人造觀音像冀得免死臨

刑三刀其刀皆折官問之故答云恐是觀音慈力及

看像項上乃有三刀痕現因奏獲免

按吳地名蓋亦六朝人也

東魏孫敬德天平中定州募士奉釋教嘗造觀音像自

加禮敬後為劫賊所引不勝拷楚忽夢一沙門令誦

救生觀世音千遍執縛臨刑誦念數滿刀自折為三

段膚頸不傷三易其刀終折如故丞相高歡表請免

死及歸覩其家觀音像項有刀迹三

此類約十數則不備錄

后魏范陽寺僧失其名誦法華為常業初死權殮隄下

後改莖骸骨並枯唯舌不壞又雍州有僧誦法華隱  
白鹿山感一童子共給及死置屍巖下餘骸並枯唯  
舌不朽此例頗衆第舉二事槩之

晉羊祜三歲時乳母抱行乃令於東鄰樹孔中探得金  
環東鄰人云吾兒七歲墮井死曾美金環失其處所  
乃驗祜前身東鄰子也又何靖有一女數歲而亡女  
始病時弄小刀子母奪取不與傷母手喪後一年又  
產一女年四歲謂母曰前時刀子何在母曰無也女

曰昔爭刀子故傷母手云何無耶母甚驚怪告靖靖曰先刀子猶在不母曰在靖曰可更取數刀子合置

一處試之女見大喜即取先者

又廣記文滄事絕與羊類以唐人故不錄

晉干寶父瑩有寵婢母甚妬之及瑩亡遂生持婢葬於墓寶兄弟尚幼不知後十餘年母喪開墓而婢伏棺如生載還經日乃蘇言其父恩情如舊既而嫁之生子又義熙四年琅琊人陳朗婢死已葬府史夏假歸行塚前聞土中有人聲怪視之婢曰我今更活為我



報家其日已暮旦方開土取之彊健如常又漢杜錫  
家葬而婢誤不得出後十餘年開塚祔葬而婢尚生  
問之曰其始如瞑目自謂當一再宿耳初婢埋時年  
十五六及開塚後姿質如故更生十五六年嫁之有  
子

又博物記載漢一宮人事全已載二函綴  
遺中此事與前切類第非六朝故錄後

宋浦陽江有琵琶圻圻有古塚墮水甃有隱起字云筮  
吉龜函八百年落江中謝靈運取甃詣京咸傳視焉  
乃驗龜繇古冢已八百年矣

見水經

東京豐都市掘得

塚得銘云筮道居朝龜言近市五百年間於斯見矣

當時達者叅驗是魏黃初二年所葬也

朝楚  
僉載

又梁任

昉得古墓銘云龜言土著言水甸服黃鍾啓靈趾瘞  
在三上庚墮遇七中己六十三百浹辰交二九重三  
四百圮歷代無知者至唐鄭欽悅始辨之詳載別刻  
右見異聞集雖唐事實出六朝

後魏天賜中河東人張恩盜發得冢得志云我死後傳

子孫二千年困於恩恩得古鐘磬皆投於河

史後魏  
系

高流之為徐州刺史決滹沱河水繞城破一古墓得

銘曰吾死後三百年背底生流泉賴逢高流之遷吾

上高原流之為造棺槨衣物取其柩而改葬焉

朝野僉載

又廣記開元中江南大水侍御史鄔載見道傍古墓

水潰其穴命遷於高原既發墓得銘云爾後一千年

此地化為泉賴逢鄔侍御移我向高原校其年果千

歲矣

此酷與高流之事類以唐時故附後

晉皇甫謐隱居不仕耽翫典籍至忘寢與食時人方之

好色謂之書淫梁劉峻從桑乾還自謂所見不博更求異書聞京師有者必往祈借清河崔慰祖謂之書淫

宋劉穆之目覽詞訟手答牋牘耳行聽受口並酬應不相叅涉悉皆瞻舉隋劉炫左畫圓右畫方口誦目數耳聽五事同舉無遺失

二事人多不信然亦未必盡誣或傳之太甚耳

晉陸機初入洛次河南偃師時直結陰望道左人居因往投宿見一年少置易投壺與機談機無以抗既曉

便去稅驂逆旅問嫗嫗曰此東數十里無村落正是  
山陽王家冢墓耳機還睇昨路空野霾雲拱木蔽日  
知所遇者信王弼也又陸雲獨行偃師中忽見一家  
牆院整峻雲時饑乏因而請前見一年少二十餘風  
姿可嘉論叙平生不異於人尋共說老子極有辭致  
雲出臨別語云我山陽王輔嗣也雲出門還望向處  
正是一冢比至家已經三日右二事俱出異苑不應  
陸氏兄弟同時見鬼當是一事記者訛作二人耳

陳后主在東宮集官僚置宴時造玉柄麈尾新成后主親執之曰當今雖復多士如林至於堪捉此者獨張譏耳即手授譏其後后主嗣位譏為東宮學士后主嘗幸鍾山開善寺召從臣坐於寺西南松林下敕譏豎義時索麈尾未至后主敕取松枝手以屬譏曰可代麈尾顧羣臣曰此即張譏後事

梁劉之遴在告常寄居南郡忽夢前太守袁某謂曰卿後當為折臂太守即居此中之遴後牛奔墮車右手

偏直不復得屈伸旣而連典此郡晉羊祜葬親遇術者云墓於法當出天子祜惡之遂掘損其墓術者再過之云尚當出折臂三公祜後墮馬折臂果至三公晉謝玄與苻堅相拒淝水玄使謂堅請退軍濟師以決勝負諸將不可堅曰俟彼半渡我以鐵騎蹙之蔑不濟矣軍旣退不可止遂大敗秦由是亡後周尉遲迥伐隋文使子惇與韋孝寬相拒沁水惇布陳二十餘里麾兵小却欲俟孝寬衆半渡而擊之孝寬等乘其

兵却鳴鼓齊進士皆一當百惇衆大敗迴由是遂亡  
苻堅伐晉至淝水大敗聞風聲鶴唳皆以為晉兵齊沈  
攸之率衆東下戰敗其子元琰奔還聞城外鶴唳皆  
以為軍聲

晉桓溫伐李勢戰於笮橋不利將退兵適軍中誤鳴進  
鼓士殊死鬪遂克之宋世祖伐元亮劬戰不利適劬  
將魯秀誤鳴退鼓遂克之

晉干寶撰搜神記時人稱之曰卿可謂鬼之董狐元魏



使李騫入梁見佛寺傍執板筆者謂之屍頭騫曰此僧之董狐也又六朝人撰酒經時謂酒之南董黃長睿號書之董狐

吳孫皓寵姬張氏死思其色使巧工刻木作美人形像常置坐側隋煬帝愛柳詵刻木作其形每飲酒必置

坐隅

孫皓時晉已革命  
吳亦遂亡故附此

少室山房筆叢卷九

欽定四庫全書

少室山房筆叢卷十

明 胡應麟 撰

史書佔畢六

雜篇下

漢唐而下史籍所書有一事譌而二之者有二事混而一之者有一事傳而餘悉泯者有一事實而餘皆虛者有二事類而無一實者即更僕未易悉數漫舉數

則以例其餘

魏時殿前鐘忽大鳴震駭省署華曰此蜀銅山崩故鐘  
鳴應之也蜀尋上事果云銅山崩時日皆如華言又  
中朝時有人畜銅澡盤晨夕恒鳴如人扣以白張華  
華曰此盤與洛鐘官商相諧宮中朝暮撞故聲相應  
可鑪令輕則韻垂鳴自止也依言即不復鳴按此必  
一事記者譌而二之

吳東陽樵夫入山遇大龜作人言因縛之獻孫權龜路

與老桑共語既至權命烹之焚柴萬車如故諸葛恪  
曰當以老桑煮之如言立爛又張華斑狸事狸亦與  
華表共語雷煥識之遂得狸本形二事不應絕肖恪  
或近實華當由博識附會耶

漢武遊上林見一好樹問東方朔曰名善哉帝陰使人  
識其樹後數歲復問朔朔曰名為瞿所帝曰朔欺久  
矣名與前不同何也朔曰夫大為馬小為駒長為雞  
小為鶻大為牛小為犢人生為兒長為老且昔為善

哉今為瞿所長少死生萬物敗成豈有定哉帝乃大笑又武帝幸甘泉長平坂道中有蟲赤如肝頭目口齒悉具先驅馳還以報上使視之皆莫能識時東方朔在屬車中令往視焉朔曰此謂怪哉是必秦獄處也上使按圖果秦獄地上問朔何以知之朔曰夫積憂者得酒而解乃取蟲置酒中立消賜朔帛百疋按朔以蟲為怪哉即名樹為善哉意也滑稽之旨即事可知即蟲或秦獄冤氣所結而怪哉之名則朔詭撰

欺帝無疑使異時再遇此蟲不知易何名號矣又漢武故事東都獻短人名巨靈見朔曰王母種桃三千年一實此兒已三偷之而洞冥記記一女人愛幸於帝名巨靈常出入唾壺中朔見之巨靈遂飛去二巨靈一男子一婦人迹俱詭異又並與朔狎或謂必有一偽余直以為皆烏有耳

朝野僉載云唐初兵部尚書任環救賜宮女二女皆國色妻妬爛二女頭髮禿盡太宗聞之令尚宮齎金餅

酒賜之云飲之立死環三品合置姬媵爾後不妬不  
須飲之若妬即飲柳氏拜敕訖曰妾與環結髮夫妻  
俱出微賤更相輔翼遂致榮官今多內嬖誠不如死  
遂飲盡然非酖也既睡醒帝謂環曰其性如此朕亦  
當畏之子其奈何因敕二姬令於別宅中安置又國  
史異纂云房玄齡夫人至妬太宗將賜美人屢辭不  
受乃令皇后召夫人語以媵妾之流令有常制且司  
空年近遲暮帝欲有優崇之意夫人執心不迴帝乃



令謂曰寧不妬而生寧妬而死曰妾寧妬而死乃遣  
酌一卮酒與之曰若然可飲此一醺一舉便盡無所  
留難帝曰我尚畏見何況於玄齡右二事絕類不應  
太宗屢賜大臣侍姬又屢以藥酒恫喝其妻而其妻  
又俱飲之也玄齡妻盧氏當房病困嘗剔目以自誓  
而晚節至斯可謂生平盡廢若此事則余直以盧有  
妬聲好事遂因環婦嫁名房妻耳不然太宗之術弗  
效於柳而復試於盧何不憚煩哉

後漢書云孝女叔先雄捷為人父泥和永建初為縣功  
曹縣長遣泥和拜檄謁已郡太守乘船墮湍水尸喪  
不歸雄感念號泣心不圖存常有自沈計家人每防  
閑之經百許日稍懈雄因乘小船於父墜處慟哭自  
投水死弟賢其夕夢雄告之却後六日當共父同出  
至期伺之果與父相持浮於江上按此事與曹娥同  
出後漢范史同傳今曹娥以邯鄲蔡氏賞識盛傳而  
此事絕無知者故特詳之

諒輔字漢儒仕郡為五官掾時夏大旱太守出祈禱山  
川連日無所降輔乃自暴庭中期日中不雨乞以身  
塞無狀於是積薪柴聚茭茅以自環構火其傍將自  
焚焉未及日中時而天雲晦合須臾澍雨一郡沾潤  
此亦與戴封同世而人罕知并錄之輔時為象尤難  
也

漢末劉平遇盜扶持其母奔走逃難兄仲遺腹女始一  
歲平抱仲女而棄其子母欲還取之平不聽曰力不

能兩活遂去不顧此事亦見後漢書列傳在鄧攸先其失則甚之矣

天寶中漢州雒縣尉張涉自舉日試萬言詔中書省試涉令善書者二十人各操紙執筆就席環庭而坐但占題目身自巡歷依題口授言訖即過周而復始至午後詩成七十餘字仍請滿萬宰相云七千可謂多矣何必須萬具以狀聞勅賜縑帛拜太常丞直廣文館時號張萬言右見唐語林又唐詩紀事長沙王璘

詞學富贍崔詹事廉問表薦於朝先試之使解璘請  
十書吏皆給筆札璘口授十吏筆不停綴首題黃河  
賦三十字復為鳥散餘花落詩二十首授筆而就時  
忽風雨暴至數幅為回飈所卷泥滓沾清璘曰勿取  
但將紙來縱筆一揮斯須復十餘篇矣未亭午已七  
千餘言時路崑當軸遣一介召之璘曰請俟見帝崑  
大怒亟奏廢萬言科璘仗策歸放曠盃酒間恒自稱  
日試萬言王某云右唐二事絕類皆試萬言皆至七

千而止璘未亭午已就較張尤速迺張竟獲官而璘  
徒步當事者固有洪隘然亦孰非命也王勳草五王  
冊文命五吏執筆分寫頃刻俱就與二事亦頗倂今  
所試不傳固宜第他什亦無存者信疾行無善迹也  
王長公卮言所載卧冰種玉射石望塵等事并其姓皆  
符合可謂至奇陳心叔名疑略全余推此更得數事  
如漢張良稱三傑唐張說亦稱三傑見玄宗詩云  
赤帝收三傑蜀  
張飛敵萬人秦張蚝亦敵萬人符秦鄧羌張蚝咸  
稱萬人敵見史書揚

雄草太玄經而楊泉亦草太玄經

見馬意林

楊傑號無為

子而楊繪亦號無為子

見瀛奎律髓釋梵類

瘞子之郭前有巨

後有世通

見南史孝友傳

分身之葛前有玄後有從周

葛仙公見

神仙傳葛從周號分身將見清異錄

遇仙之王前有質後有積薪皆觀

碁也去婦之王前有歡後有季友皆勤學也

為婦所棄也歡

事見顏平原判語季友事見杜工部歌行所謂河東女也

采薪讀書之劉前貞素

後仁軌閉戶讀書之劉前孔昭後士元

孔昭畫字士元焯字

逃

儒入釋者梁彥和逃釋入儒者唐希仁六用並行者

宋穆之五事全舉者隋光伯皆劉姓也而百藥藥師  
二李咸竊楊素之姬士衡士龍二陸互見王弼之鬼  
尤為可笑至武與贍並善兵著書並曰孫子而孫綽  
書亦曰孫子爽與衍並善辯著書並曰鄒子而鄒陽  
書亦曰鄒子此例頗衆若睢蠡仲淹三范並變姓名  
咸著聲績又千古異聞也

晉書王徽傳與顏稍異  
彦和魏字希仁軻字也

古今字號之全尤有奇者並識之

號浮休之張前有文成後有芸叟

唐張鷟宋張舜民  
並號浮休子見史稱



紫芝之俞前有秀老後有玉吾

宋詩人俞秀老元文士俞琰並紫芝

中

山之劉前禹錫後子儀

一唐一宋並名劉中山集

東萊之呂前居

仁後伯恭

一祖一孫並以東萊名集

少室山人之李有布衣有拾

遺

李荃隱居不仕李渤徵為拾遺並有斯號

石林居士之葉有尚書有少

保

一吳縣人位至執政見宋史一松陽人官至尚書見一統志皆名夢得皆徙湖州皆博學著書

集

花萼之李前尚正後子大

唐李尚正兄弟三人宋李洪五人俱有花萼集

封

花蓋之徐前行母後昶妃

俱為蜀人見邵璞類稿或云後花蓋費姓俟考

至

李義府呼李猫李德柔亦呼李猫尤可笑也

見南唐近事

漢兩子夏兩子雲

杜欽杜鄴俱字子夏揚雄谷永俱字子雲

並能文兩子

夏又同姓且同時也宋兩方叔兩功父

一方叔李定孫一方叔李

勇字一功父郭祥正一功父張南湖

並能詩二方叔又同姓且全時也

宋又有兩張子厚

其一闕中人號橫渠者其一見呂居仁詩語是吳中人亦舉進士嘗

為歐陽棐書六一廬山高詩見石林詩話

兩張子野

俱名先俱天聖間進士俱能詩俱壽考一

博州人號張三影一吳興人見齊東野語

韓文公有二一唐昌黎一南唐熙載熙載去宋近像傳

於後世遂以為昌黎

此與陳孟公事生前身後可作一確對也

兩京房俱術士兩劉歆俱儒生兩龔遂俱郡守兩韓信

俱武略俱封王俱亡國兩張禹俱文學俱封侯

一安昌一

安鄉俱享年造物之巧如此

光武紀受尚書于許子威劉歆著五行傳

二王喬皆得仙世知之二劉商皆得仙則人罕知也二

王匡皆為將世知之二劉茂皆為將則人罕知也二

王褒皆能文世知之二劉德皆能文則人罕知也然

又有三王喬三劉商三王匡三劉茂五王褒三劉德

異哉

此例古今頗衆詳余全姓名考中往讀路史十數人常以為駭近乃知其疎也

向歆本父子然劉植傳子名向兄歆字細君則歆伯向姪也兩劉仲一高祖兄一光武兄皆同胞皆不類王

商有七漢四人王吉有五漢三人

俱詳全姓名考

婦人事尤有酷類異常者弑君之姜前有文後有哀殺子之武前有壘後有惠淫亂之馮前有文明后後有孝文后皆同代二馮二姜又同族也春秋事人共知二武殺子俱見傳惠妃之惡不減驪姬非玉環可望以早天人罕知二馮各見魏書然蜀有兩花藥夫人

一王衍母隨衍入唐一孟昶妃隨昶入宋皆徐姓皆能詩皆亡國皆不善終竅合乃若此哉

花葉詳郎瑛類稿一云費

氏

古今事類更有甚者漢兩嚴遵一字君平一字子陵

皆高士又皆易姓

始皆莊姓避諱易嚴見傳

皆二名

君平一名尊子陵一名允

亦見傳中

兩樊崇俱賊帥一赤眉一尤來兩李育俱賊將

一王郎一公孫又皆一歸附一滅亡唐兩李光進一

光弼弟一光顏兄皆為將皆假節皆兄弟有戰功又

皆名為兄弟所掩宋兩李定一彈子美一彈子瞻所  
害皆文士皆正人皆蘇姓又皆下獄幾死此數人者  
其世代同名姓同人品同事實同一至於是何其異

哉

李定劾蘇舜欽見朱子語錄甚詳筆談又有夷  
將李定亦熙寧時又見劉備李通傳共五李定

世知馮婦之男子而不知許負之婦人也

見三國志劉  
焉傳末漢封

明雌  
亭侯

世知王聖之婦人而不知孟光之男子也

王聖  
漢安

乳母擅權當時宦官有王聖然不甚著  
孟光梁鴻妻外蜀孟光見三國志有傳

三李平一婦

人二男子俱貴顯

一漢成帝婕妤一劉  
蜀大臣一元魏名將

四巨靈二男

子二婦人俱怪神

一仙掌巨人一東都短人一漢武宮妃一九元真母見路史

宋制科題有堯舜湯禹所舉如何乃漢時宮中謁者趙

堯舉春李舜舉夏倪湯舉秋貢禹舉冬各職天子所

服也又湯周福阼乃張湯杜周也當時士子以唐虞

三代為對遂無一合者

見沈氏寓簡又醫家有二扁鵲二雷公詳別則

世知仲尼文宣王而蕭子良長孫稚亦皆文宣王也延

岑號武安王在忠義前劉嘉封漢中王在昭烈前今

但知玄德雲長劉仲諡魯哀公朱建稱平原君皆在

後尤僻也

文宣見路史餘並見兩漢書又李光弼岳飛俱諡武穆岳與諸葛又俱諡忠武

先仲尼稱聖於魯者臧紇後仲尼稱聖於魯者展禽又

楊震在漢稱夫子而李固弟子亦七十二人蕭頴士

在唐稱夫子而權德輿門生亦七十二人

展禽至孟始以聖稱

西京雜記有杜陵杜夫子三十國春秋有舞陽杜孔子

稱名之類一至於此記謂杜奕棋天下第一蓋其徒

尊之若抱朴子所稱棋聖之類然拾遺素稱詩聖又

稱集大成又自稱杜陵曷若奪此稱還吾子美不尤



稱情耶

又莊忌稱夫子是字

顏回為羌帥曾參為市人已見前載稱顏子者黃憲外  
謝尚徐陵周續之皆六代人也稱曾子者張霸外宗  
元卿蔡曇知滕曇恭皆一時人也

南齊人俱見南史  
列傳又陸雲亦稱

顏子

兵家有十哲僧家亦有十哲皆能詩者畫家亦有十哲  
皆散見諸書人多不備錄又唐舉場有十哲又權德  
輿門生七十二中十人登輔相為十哲尤可笑也

三傑有三漢諸人外唐吳少微富嘉謨谷倚皆文人張

說源乾曜宋璟皆宰執三君亦三

一即陳蕃等  
二見名疑

三高

有二

何點及  
范蠡等

三少有四

已見  
名疑

四友有四周文王外吳太子孫登四友諸葛恪張休顧

譚陳表晉王敦王澄庾歆胡毋輔之唐李嶠杜審言

崔融蘇味道四皓亦有二商山外六朝徐伯珍兄弟

四人皓首相對號四皓四公子二

一戰國  
一梁時

四豪外有

四英

諸葛  
亮等

四傑外有四俊

員半千等見史  
及唐詩紀事

五老有二唐曹松等五人登第皆年七十餘號五老榜  
在宋耆英前五侯二俱東漢一王氏一宦官

七子不始建安鄭公孫黑強與六大夫盟謂之七子七  
賢不始竹林後漢書袁祐等七人以身扞刃救郡守  
皆死褒曰七賢又七賢過關是李白張九齡王維鄭  
虔張說李華孟浩然又七貴亦二已見名疑

唐虞八元八愷周八士晉八王外漢八俊八顧八及各

二

詳黨  
錮傳

晉則八達有三

並見  
名疑

然晉又有八伯  
郗鑒為

方伯阮放為宏伯卞壺為裁伯蔡謨為朗伯胡母輔  
之為達伯阮孚為誕伯劉綏為委伯羊曼為黠伯見

曼傳

顧厨俊及獨  
八厨不再見

著書名姓相類如三孫子三鄒子皆世所共知又名各  
不同不足相亂然有不可不辯者二孔甲一黃帝史  
一仲尼孫俱著書俱名盤孟一載漢藝文志一附孔  
叢子中今藝文志之盤孟不傳而孔叢子之盤孟傳  
世遂以後之盤孟傳前之孔甲非也二年融一漢大

尉一漢布衣俱著書俱名年子一載隋藝文志一附

弘明集中今藝文志之年子不傳

意林所載尚百餘言

而弘明

集之年子傳世遂以釋之年子傳儒之年融亦非也

又夏帝名孔甲而唐詩人有年融尤奇孔叢之盤  
孟疑崇文目誤而弘明年子余疑為偽言俱有辨

醫家二扁鵲一黃帝時人一戰國時人二雷公一黃帝

時人一趙宋時人按戰國秦越人明洞醫道世以其

與黃帝時扁鵲類因為號今所傳難經乃秦越人

作非扁鵲也宋雷斅撰炮炙三卷人多不知其名但

以素問有雷公為黃帝弟子遂以炮炙即黃帝時雷公撰其人與事酷類有如此者今二書盛行黃帝時扁鵲宋之雷公殊沒沒因詳識此以例其餘按隋志有雷公注神農本草四卷此當是偽託黃帝時者非宋人也漢志經方類有秦始皇帝扁鵲俞附方三十卷此當是黃帝時扁鵲然亦依託未必真也

世率以東漢無二名者亦不盡爾第以不甚顯故人罕知余讀後漢書及通鑑得數十人識於後

西門君惠

王莽時勸劉秀反者見鑑

丘靈舉

字季知見王彙傳注餘二名者多字

力子都

亦莽時羣盜東海人

劉文伯

即盧芳也

劉子興

即王郎也

劉俠卿

劉盆子嘗為俠卿牧羊

鄧仲覽

延年將見鑑建武五年

遲昭平

平原女子見鑑王莽地節元年

儲大伯

光武大夫說鮑永者

焦仲卿

見樂府

彭子厚

彭寵姪

彭蘭卿

亦彭寵姪並見後漢寵傳

劉盆子

蘇不偉

見後漢書與蘇章同傳

費長房

後漢書方術傳

蒯子訓

謝夷吾

樊志張

計子勲

王和平

自費長房至此六人並見方術諸傳

曹世叔

曹大家夫

劉長卿

妻見列女

陳文矩

見列女類李氏夫

衛仲道

蔡琰先適夫見董祀妻傳

劉駒餘

見文苑劉珍傳

卿仲遼

見黃香傳

叔孫無忌

見方術趙彥傳

魯女生

附華陀傳末

冷壽光

附華陀傳末

劉景宗

見華陀別傳附後漢書陀傳注中

東郭延年

見甘始傳道術士也

封君達

全上

侯子道

見嚴光傳注

韓怡休

韓伯休先名見侯傳



謝季孝

見戴良傳

虞都尉

漁陽大姓見馮魴傳

韓仲伯

見李熹傳

李子春

全上

曹破石

節弟見傳

李曼卿

識命者見王郎傳

董次仲

檀鄉賊帥並下俱見光武紀注

士師郎

獲索賊帥

梁安國

統孫附傳

梁伯玉

冀子附傳

梁不疑

冀弟

鄭居業

衆之曾孫附傳

謝曼卿

見賈逵傳

桓元卿

見桓榮傳

劉能卿

見更始傳

李子雲

見逢萌傳

馬伯濟

武兄附傳

成翊世

見杜根傳

尹不疑

單超傳

徐匡鈞

吳良傳

戴次公

黃昌傳

伏無忌

見後漢書序

董奉德

任末傳

令狐子伯

王霸妻傳

楊光憲

鄭弘傳

叔先泥和

列女叔先雄父

韓伯高

見儒林薛漢傳

澹臺敬伯

全上

孔長彥

見孔僖傳又弟季

任文公

見方術傳又父文孫

張伯路

見左雄傳

劉文松

全上

甄子然

見孔融傳

臨孝存

全上

郝孟節

附方術王真傳

蘇伯阿

見光武紀紀末史論

王君公

避世牆東者

樂羊子

見列女傳羊子名也

解奴辜

方術有傳並下三人俱附見

麴聖卿

壽光侯

注壽姓也則光侯當為名

編育意

嚴彭祖

見儒林董鈞傳

顏安樂

全上

王延壽

文考賦靈光者

馬日磾

與蔡邕同時

蔡少公

鄧晨傳

鄭安世

來歙傳

劉少公

劉永弟見傳首

樊巨公

見劉續傳

駿馬少伯

見盧芳傳夷人也常疑此類為字即此知其為名且謝夷吾等史皆載字甚明

東漢諸王侯無表故宗室二名者無考紀傳附見者得

數人

劉延平

見清河王傳又有常保虎威二人

劉子張

更始父見傳

劉萬歲

廣宗殤王有傳

劉元壽

見明帝十四年

劉德然

以下並見先主傳

劉弘世

先主父

劉子敬

劉元起

劉安國

見濟北王傳

婦人二名者

曹豐生

見曹大家傳

劉賢得

陰城公主見順帝五年注

友通期

梁冀妾見傳

王伯榮

王聖女見楊震傳

陳心叔名疑考據殊精洽然亦謂東漢三國無二名者

蓋因襲前人之說余讀三國諸紀傳二名者頗不乏

第多東漢末人至鼎足之後則誠罕覩而傳有周生

烈朱建平者固不盡無也又陳壽多以字為名今錄

其灼然者

周生烈朱建平並魏志有傳三國志傳中二名者惟此二人

曹安民

操姪征張繡亡

婁子伯

見魏武紀破馬超附裴注中

張平世

見先主傳

吳子蘭

全上

王子服

同吳子蘭皆與先主謀誅操者

劉子平

附見先主傳注中

崔州平

石廣元

附見先主傳注中

蔣義渠

見袁紹傳

嚴白虎

見孫策傳

皇甫堅壽

嵩子附傳

馬元義

張角將見嵩傳

徐季龍

字開明見管輅傳

劉奉林

全上

單子春

鮑子春

王弘惠

陳承祐

華長駿

管孝國

以上俱見官輅傳注

楊阿若

見閻溫傳注

祝公道

全上又孫賓碩自名嵩非字也

趙君安

龐烈婦父

龐子夏

並附魏龐涓傳注龐烈婦夫也

龐娥英

婦人即樂府龐烈婦名附注甚悉

戲志材

魏謀臣見荀彧傳

大抵東漢三國帝王將相皆單名二名者百中無一故

雖以王延壽之才名馬日磳之職位而思慮往往弗

及若精心以求則紀傳之中此尚未能盡也

卮言謂漢諸侯王同名甚衆而唐世尤繁聊撮大都於後但什之六七耳不能舉其詳也漢人以宗正失職故唐之宗正豈亦皆失職耶其與士庶同者計當數倍昭代宗室命名悉用奇字旨哉至如兩李迥同行密邇而俱封延德郡王尤不可曉非史誤則傳刻之訛也

羅泌云唐諸王義成曰琮而奉天又名之鬱林曰恪而建王又名之此未熟唐史故以一二為

奇儻備考之則宗室全名可勝計哉



五李恪

一鬱林王一建王一越王孫一東平郡王一趙王孫

四李琛

一襄武王一蔣王子一許王子一趙王子

三李晟

一越王孫一紀王孫一犀浦尉封西平王者非宗室也

三李琮

一玄宗子一讓王孫一義陽王

三李瑗

一廬江王一樂安王一許王孫

三李滋

一宋王一夔王一馮翊郡王

三李禕

一信安王一深王一遂王

三李瓘

一許王子一趙王孫一紀王孫

三李紳

一袁王二俱蔣王孫一史有傳非宗室下全

三李璋

一趙王孫一蔣王子一許王子又一見史

四李準

一紀王孫一叅軍一王城尉一大鄭王孫

三李煜

一信安子一蔡國公一襄王又五代後主

四李頊

一汝州刺史一蔡王孫一蔣王孫一紀王孫

三李琳

一安德郡公一讓王子一許王子

三李係

一越王一蔣王孫一成王子

三李絢

一衡王一霍王孫一南昌郡公

三李珪

一安樂郡公一陳王一趙王孫

三李諤

一信安郡公一江王孫一鴻臚卿

二李愔

一太宗子一憲宗子

二李寬

一太宗子一晉陽丞

二李鳳

一太宗子一江王孫

二李峴

一信安子一武宗子

二李瑤

一玄宗子一許王孫

三李詠

一寧王孫一代宗  
子一寧溪郡王

四李穎

一南安王一義烏丞  
一秘書一少監

二李環

一江王孫一濟王

三李翊

一趙王孫一江王孫  
一紀王孫

二李佺

一宜春郡王一信  
州刺史

二李統

一安定郡王一蔣王  
孫

二李澤

一趙王孫一濮王

二李悅

一瓊王一趙王孫

三李綱

一南陽公一蔣王  
孫又一唐書有傳

二李訓

一潁川郡公一趙王  
孫一史有傳

二李讓

一紀王孫一餘姚  
尉

二李構

一申王孫一杭州刺  
史

三李樞

一趙王孫一鄭王  
孫一太原少尹

三李謀

一通王一江王孫一  
寧王孫

四李顥

一吏部常選一鄆國郡公一紀王孫又太平廣  
記妖狐類有參軍李顥又一蔡王孫

二李溫

一江王孫一沈國公

二李仁

一殿中監一成王

三李演

一江王孫一寧王孫一臨川郡王

二李慎

一紀王一高陽郡王

二李保

一吉王一吳國公

二李禎

一端王一雅王

三李建

一武威郡王一蜀王孫一資州司馬

二李純

一蔣王孫一資州司馬

三李逢

一江王孫一宗正一蔣王孫

二李悰

一深王一餘姚令

二李嶧

一信安子一武宗子

二李琬

一玄宗子一許王孫

三李良

一桂府少監一撫州別駕一江王孫

二李禮

一江王孫一沂王

二李垂

一紀王孫一趙王孫

三李俠

一許王孫一員外一國子祭酒

三李璿

一涼王 一晉國丞  
一鄭王子

三李愈

一岐王孫 一江王孫  
又一同

二李頔

一紀王孫 一江王  
孫

二李逸

一岐王孫 一雅王

二李瑒

一許王子 一薛王  
子

二李汭

一清河郡王 一昭王

二李璘

一玄宗子 一同州  
司馬

二李漢

一清懷太子 一東平  
郡王

二李臯

一曹王 一主簿

二李諒

一虔王 一南康郡公

三李俊

一濟南王 一零陵  
王 一趙王孫

二李崇

一江王 八世 一江王  
九世

二李伸

一玄宗孫 一穎王  
子

二李諷

一施州刺史 一共原  
郡王

二李涉

一寧塞郡王 一晉  
平郡王

二李諶

一蜀王孫 一上黨郡  
公

三李緯

一均王 一鄭王孫 一蔣王孫

二李偲

一郡王 一趙王子

二李珙

一豐王 一六安郡王孫

二李琨

一嗣吳王 一宗閔子

二李纁

一蔣王孫 一會王

三李銳

一申王嗣 一郡王 一州叅軍

二李誼

一舒王 一武陵郡公

四李暹

一昭王 一鄭王孫 一江王子 一蜀王孫

二李績

一欽王 一蔣王孫

二李佺

一經王 一平陽郡王

二李儉

一德陽郡王 一秘書監

二李煒

一鄆王 一嗣蔣王

二李賢

一章懷太子 一江王孫

三李約

一江王孫 一邵王 一兵部員外

三李綽

一趙王孫 一邢國公 一蔣王孫

二李續

一東平郡王 一江王孫

二李琚

一玄宗子一江王孫

二李珣

一信都王一鴻臚卿

三李儀

一信都郡王一武陽郡王一祭酒

二李瑛

一玄宗子一許王子

二李玘

一義王一太子詹事

二李迥

一韓王一絳州刺史

二李窠

一樂安郡王一昆山人

二李傑

一趙王孫一國子祭酒

三李繁

一節愍廟令一蔣王又一李泌子

二李實

一雍王孫一京兆尹

三李紹

一蜀王孫一趙王六世又十一世

四李遇

一鄭王孫一端王一蔡王子又五代將

三李渾

一蜀王孫一蔣王孫一蔡王孫

三李程

一蔣王孫一錢塘丞一唐相

三李平

一蔡王八世一十二世一秩石尉又一蜀人又元魏將又漢官人亦名李平

三李福

一和王一趙王一定州刺史又一唐書有傳又一見太平廣記又一宋李全兄共六人

六李祐

一蜀王孫一太宗子一昭宗子一申王孫一嘉王一蔡王又一淮西將共唐有七

二李清

一新平郡王一常山郡公又一見唐詩紀事一李澄子見傳一隋宮人遇仙一見廣記再生類

二李宗閔

一蔡王孫一唐相一參軍一隱太子一宣州

二李元裕

一高祖諸王一太常秉禮一李方叔一蔡王孫一紀王

二李餘慶

一隴西郡王一嗣濮王一李孝逸一給事中一武后

二李紹宗

一江王孫一蔣王孫一李友諒一蜀王一寧王孫

梁元帝有同姓名錄丘光庭有同姓字錄皆不傳然其



書各一卷雖唐以前時代較近要不足以盡之抑且唐以後絕無踵作者余嘗欲為一書續之而未能頃邁幽憂屏居郭外蕭然半榻僅唐史一編案頭日取閱之見其中姓字相同者頗自不少而世第共傳李益韓翃數人因益取稗官雜說凡唐一代名姓相同者數十百人類而錄之以為廣見洽聞之助其異代姓氏同者不可勝紀將別有編錄不列此中其已見王長公藝苑卮言附錄及陳心叔名疑者亦不復入

名疑引載僅李光進盧貞五  
人卮言及郎氏類彙略全

兩張昌宗一昌齡兄與昌齡俱才顯一易之弟與易之

俱色稱

兩呂太乙一中宗朝文士以才稱一代宗朝宦者以反

戮

二條並  
見唐書

兩薛仁貴一武將見唐書一文人注周易見唐書藝文

志次第在王勃前陸德明後蓋亦高宗時人當與征

遼建功者相去不遠而傳絕不言其能文著書考之

唐世河東之薛文學最盛蓋一時名姓相同決非為  
將之仁貴也楊用修執此以仁貴為文武兼才與韋  
孝寬並稱按唐書張仁愿傳云唐初才兼文武僅郭  
元振唐休璟裴行儉及仁愿未嘗一齒仁貴則注周  
易者非其人必矣藉令史傳中於著述或不盡載亦  
當稍稍及其文義大端而仁貴本傳第稱其力田起  
家傳末竟不略槩好文博雅等語用修之誤瞭然無  
疑

碑注云天寶二年名禮字仁貴河東汾陰人按新舊唐書薛傳並無此文惟通鑑有之以僻甚附記此

兩陳商一見昌黎集一會昌五年進士見通考孟達集下

三張萬福一德宗朝救陽城人所共知者一與柳芳同時見酉陽雜俎第七卷末以鑿名非武將也一撰五等朝儀見通志略乃道家者流

兩李商隱一玄宗朝太子賓客見舊唐書明皇本紀一

晚唐詩人

兩施肩吾一中唐元和間進士見唐詩品彙紀事等書  
一撰鍾呂傳道集在晚唐間年代相去差遠故陳振  
孫以為二人見文獻通考神仙家余别有辯詳玉壺  
遐覽中

兩楊復恭一晚唐宦者見唐書一晚唐詞人有詩集或

即一人未可知俟續考

藝文志有復恭  
行朝詩一卷

兩李惟岳一元德秀門人一李寶臣子俱附見唐書傳

中

兩李文悅一見安史叛時一見憲宗修麟德殿時通鑑

所載

又古今說海趙合傳有李文悅蓋即安史叛時者

兩劉延祐一藏器兄見唐書一守文子見通鑑

兩劉從諫一許叔冀將降史思明一劉悟子並見通鑑

兩李抱真一李抱玉弟史有傳一李匡威寮屬附見傳

中

兩李克寧一李澄子見本傳一克用弟見莊宗記

兩李伯禽一太白子一嘉興監與神昏見通幽記

兩王景崇一晚唐鎮將一後唐牙將各有傳

兩李昌符一唐末詩人見全唐詩話一唐末叛將見通

鑑等書

兩李行言一中宗給事見祝欽明傳一宣宗刺史見通

鑑等書

兩郭震一代國公字元振一御史劾趙彥昭見紀事

兩王質

一見唐書有傳一唐詩人又一遇仙一列北史之恩幸一見南史王或下一宋人字景文

兩王峻一侍御方慶子一邊將唐史有傳

又見百將傳綱目等

兩韋溫一韋后族禮部尚書一韋綬子集賢學士

見史

兩李珣一淮南使相一江陽富氏已見名疑又隋道士

李珣見龍城錄趙昇下

兩吉頊一武后酷吏一大歷詩人見紀事十才子下

兩王適一初唐詩人一見韓昌黎集墓志中

兩李義一初唐詞人一陳敬瑄叅謀見僖宗光啓三年



兩裴廸一與王維唱和一唐末幕官五代史有傳

兩韓弘一見高祖紀王世克僕射一憲宗都統

兩張祐一晚唐詩人一見新唐書孝友傳叙

前張祐一作祐

兩王翰一初唐詩人一太和間邠州人見廣記一百八

### 十九卷再生類

兩杜確一見鶯鶯傳一為岑參集序見文獻通考晁公

### 武讀書志


兩李翰一唐文人一石晉時學士見五代史元欲傳

兩李福一李石弟見唐書一南唐將見唐餘紀傳

三李清一天寶進士見唐詩紀事一興元鎮將李澄子  
見本傳一隋末富人遇仙至唐存又一李清仕晉為  
桓溫叅軍嘗死再生與隋李清頗類共見太平廣記  
兩無可一見酉陽雜俎諾臯記一詩僧見品彙紀事

四澄觀詩話總龜云唐中葉浮屠中有四澄觀架支提  
以舍僧伽者洛中之澄觀也叅元名太師為華嚴疏  
主譯經潤文者會稽之澄觀也傳燈錄有鎮國大師

澄觀又有曹谿別出第二世五臺山華嚴澄觀大師  
諸人外如李涉李清李遠李洞李續李諒俱詩人李邕  
李漢李繁李邵李程李紳俱文士李綱李絳李晟李  
福李祐等俱名臣考之宗室並有同者羅泌謂張良  
有九王言十八今唐才三百年而有八李祐六李福  
五李清李恪四李晟李紳以異代錯綜之可勝數哉



少室山房筆叢卷十